

2 Korini

2 Korini sawi one mahemakapukusa someane oyapo.

Yasu hepene yapura hisiakipoko keremisi tuaneti fae su (25) faraka, Poremo Keresoa paosa aporo hinamo Korini taonea risiaki sawi fana popasapo. Ipu makata watikiaka rakisiane Poremo maropohoko hemakapusuasamo sawi ane popasapo.

Wakesema nina, iane maiyaka risikinarakapo, aiyaka Poremo hemakapuraka, Taetasemo aseako pusiesapo. Taetase pukua Poreane Masetónia hauaka á reakipoko, Taetase paripesapo. Taetase peraka Poreaki someraka, "Korini aporomo namina makata watikisane maroposapo. Asiāne aporo metakiramo Poremo someane koaretaeraka, kotafe tarira aporomo someane kaikia kekemaraka risikinapo," aisapo.

Asiāne Kotimo Poreane tarira apororaka rakismo murikimasane Poremo ipi paroaka somesapo. Korini aporo hinamomo Yasuane hemakapusimo Poremo fanaraka some kasapo. "Kotafe tarira aporomo someane repo kakimakopo," aiyaka Poremo somesapo.

Arirakano Poremo some meta soko sawi wo popasapo. Yutía hauaka á Keresoa paosa aporo hinamo makata forokoa risiaki repo mone sarimaraka kakanie, aiyaka Poremo sawia popasapo.

2 Korini sawia some kepo parakuraka popasane oyapo.

1:1-11 Poremo Korini aporo hinamoaki sawi one kepomarekea poparaka Kotiaki susesapo.

1:12-2:4 Poremo someane ereketae susu somerapo.

2:5-11 Watikiaka rakisia aporoane repo fanasisasamo pasimakanie.

2:12-17 Ano peakosaposane makata fasere perakano ano pesafapo.

3:1-4:16 Kotimo fana someaka masane Kotimo kawe someaka masamo marokesapo.

5:1-10 Isu hepene yapura hinaka kau kawe kotesa mokoakosapo.

5:11-6:10 Poremo makata rakirane aporo hinamomo Kotiaki hemakapusimo some karapo.

6:11-7:4 Aporomo ipi hokosaki somera ayiáka Poremo iaki ayiáka somerapo.

7:5-16 Poremo Taetase aseraka sesesapo.

8:1-9:15 Kotiane hemakapukua risike makata forokoa risia aporoane arareraka mone kakanie, aisapo.

10:1-13:10 Kotafe tarira aporoane Poremo marokesapo.

13:11-14 Poremo ayapasapo.

**Keresoa paosa aporo hinamo Korini taonea risiaki Poremo
sawi meta keseke poparaka makesane oyapo.**

1 ¹Kotimo hemakapusua aeyaka ano Pore Yasu Keresomo tarira aporo rekeasimo murikimasane anopo. Nōmo soko, isiaipo Keresoa paosa aporo mae Timotimo soko, etapo reane hemakapurakanapo. Re Yasu Keresoa paosa aporo hinamo Korini taonea risiane soko, Kotimo aporo hinamo Akaia hauaka á risiane soko, re suaki nōmo sawi one poparaka makerakanapo. ²Isiaipo Ata Kotipe Unihae Yasu Kereso tetapō reaki yaku ararenane soko, auaraka risirane soko, yaiya kakasimo hemakapurakaripo.

Kotiaki Poremo susesane oyapo.

³Isiaipo Unihae Yasu Keresomo ipi Atane Koti ipipo. Kamenakaraka hemakapura kepoane soko Koti ipipo. Isu kára himu nekea umiraka risikino, isu mapirahoasimo kamenakaraka some kará kepoane soko Koti ipipo. Asiamo isiaipo Kotiaki kekerehoanie. ⁴Makata umisa isu kaua fasereperakano isu himu kára nakohoamo Kotimo isuane kamenakaraka arareraka mawakapuraka rekenapo. Asiasamo aporo meta kaua makata umisa fasereperakano, isiaipo aseraka kamenakaraka ararehoane siahoasireapo. Asiamo Kotimo isu kamenakaraka araresa ayíáka, aporo metane soko, isiaipo ayíáka kamenakaraka ararenapo. ⁵Yasu Kereso kára kau teraka himu nesa ayíáka, isu soko kára kau teraka himu nekea risirapo. Isiaipo Yasuane kekemarakano aporomo isu mokoatikinapo. Asiasamo Yasu Keresomo isu kára kamenakaraka ararenapo.

⁶Arirakano aporomo isu mokoatikirakano, mokoatikina umisane isiaipo mokoa risikinapo. Re arareraka arirakano Kotimo re mafasikia ayikasimo umisane isiaipo mokoa risikinapo. Mokoa risikino Kotimo isu ararenapo. Ararerakano repo asekeea úyaka hemakapunie. “Tarira aporoane mokoatikirakano Kotimo i ararena ayíáka, aporomo isu soko hakásá nineraka mokoatikirakano, Kotimo isu soko ararehokosapo.” Aíyaka hemakapukua himu mahisinane metakarikia himu mapiraraka hemakapukua risikianie. ⁷Asiamo isu kau teraka himu nekea risikino, Yasu Keresomo isu kamenakaraka ararena ayíáka, re soko kau teraka himu nekea risikino, epo re soko kamenakaraka ararehokosapo. Asiamo repo Kotiaki yaiya hemakapuraka risikiásimo hemakapurakaripo. Hemakapurane isiaipo metakarirakanafapo.

⁸Keresoa paosa aporo maeo, Esea hauaka á aporo metakiramo isu kára mokoatikisane re himeteraka risirapaka, repo kaiyisimo sawi one

poparakanapo. Arirakano mokoatikisane itifisiafapo. Kára mokoatikisapo. Kára mokoatikisamoa isiaapo maíyane keposahopo. ⁹Isiaapo isina hemakapuraka, “Maiya omo isiaapo maíyane farakanapo,” aíyaka isiaapo hemakapusuapo. Aíyaka hemakapuraka mokoatikina umisane marirakano faserepesare? “Isiaapo isina wakapuane siahoasifareapo. Kotimo ipi wakapu hákasamo siahoasireapo. Kotimo aporo kusua maturikia taenasasamo ipi wakapu hákasane siareapo.” Aihoasimo makata umisa kára faserepesapo. ¹⁰Isu mokoatikisa kukufunusa nine Kotimo isu kára arareraka mafasisiaapo. Mafasirakano isiaapo hemakapuraka, “Efera hunia soko Kotimo isu arareraka mafasiakosapo,” aíyaka hemakapurakanapo.

¹¹Arirakano repo isupoko farimaka Kotiaki kurikuriana amo Kotimo isu ararerakanapo. Kotimo ararehoasimo hemakapukua, repo soko aporo hinamo metakiramo kurikurirakano, Kotimo kaikia isu makoterakanapo. Makoterakano aporo hinamo yakaimo asekeea Kotiaki kára susehokosapo.

Poremo someraka, “Ano peakosapo,” aisa nine parisane kepoane oyapo.

¹²Nōmo some one reaki kakaro somerakaripo. ^a Ano Keresoa paohoanafonosa aporoyaki reane soko, re Keresoa paosa aporoyaki ano reane soko, maiya suamo ano koteaka reapo. Asiamo nena aporomo hemakapusuane nōmo kekemasafapo. Kotimo wakapumo ano yaku arareraka, makata aina kotesa soko ereketaenane soko, anoaki kasapo. Asiamo Koti hikumisia ano reyaki kakaro koteaka reapo. Koteaka reke nōmo himumo hemakapuraka, “Ne siaraka rekenapo.” Aíyaka hemakapurakarakan koteaka reane repo kaiyisimo nōmo mahamerakanafapo. ¹³⁻¹⁴Sawi one repo menoraka hemakapusimo nōmo reaki hufitaeraka poparakanapo. Mahamekea poparakanafapo. Yumo nōmo hemakapusuane repo wakasema hemakapukua, keseke repo koteaka suane hemakapusimo nōmo hemakapurakaripo. Nōmo hemakapuraka Unihae Yasu pariapera maiya amo nōmo reaki sesehokosa ayiáka repo anoaki ayiáka sesehoasimo hemakapurakaripo.

¹⁵Repo anoaki seseraka hemakapukusane nōmo hemakapukua someraka, “Re makotehoko yape tetá repo taonea ano peakosapo.

¹⁶Aíyaka Masetónia hauaka á pukusakipoko repo taonea ano pekea, wakasema nina aeyaka metakarikia, Masetónia hauaka á pukua wakasema nina, pariapera maiya amo, repo taonea efera hunia pekea, wakasema rekeakosapo. Nina Yutía hauaka pukusakipoko repo ano ararehoasimo maiya wakasema rekeakosapo.” Aíyaka nōmo hemakapukua somesapo.

^a 1:12 Pore peakosapo aisane peanafonorakano Korini aporomo Pore hukururaka someraka, “Kotafe somera aporoane nepo.” Airakano Pore parisa kepoane iaki somesapo.

¹⁷Aiyaka somesane peanafonorakano, repo metakiramo someraka, "Poremo himu tetá hemakapurapo," aisapakae. Asiamo repo hemakapusuane, ano nī makotehoko peako ayireare? Repo hemakapusuane, nōmo kotafe horapo, aiyaka hemakapurakanare? Arirakano repo hemakapusuane, maiya metamo nōmo aoraka, maiya metamo nōmo waeraka, airare? Wae, nōmo airafapo. ¹⁸Arirakano Kotimo ipi makata ayiakakosaposane kakaro ainapo. Aina ayiáka nōmo soko kakaro somerapo. Nōmo aorane himu tetáraka hemakapukua aorafapo. Nōmo aorane waehoko aorafapo.

¹⁹Nōmo soko, Saerasemo soko, Timotimo soko, isiapo Kotimo hokosa Yasu Keresoane reaki fana some kasapo. Arirakano Yasumo some tetáraka somerafapo. Epo aoraka, waehoko aorafapo. Kotimo somerakano Yasumo aorapo. ²⁰Asiamo Kotimo ayiakakosapoaka someaka motosane kepoane Yasu ipipo. I pisasamo isiapo Yasuaki kataka marekea risike Kotiaki kekerena maiya amo kakaroripo, airapo.

²¹Isiapo soko, repo soko, Keresoaki himu hakásaraka hemakapukua paroaka risikiasimo, Kotimo isuaki paroaka risirane kasapo. Isiapo rakirane soko, epo isuaki rakinie, aiyaka maresapo. ²²Isu suane epo ipi menapo, aiyaka isiapo hemakapusimo saro senaki patena ayiáka isuane epo ipi máka motoraka, Ho Kotesa isu himua maresa ayapo. Kotimo ayiakakosaposane isiapo kakarorakae aiyaka hemakapusimo, Ho Kotesa fana maresa ayapo.

²³Arirakano Kotimo ano himu aserasamo epo kaiyisimo nōmo kakaro somerakanapo. Repo makata aina watikisane nōmo maropohokosakipoko ano Korini taonea peako asiāne repo mahisinapaka ano pesafapo.

²⁴Asiane repo Kotiaki himu hakásaraka hemakapurane paroaka risikinapo. Asiamo isiapo reane mawakasemaraka somerakanafapo. Re seseaka risikiasimo isiapo ararehoko hemakapuraka somerakanapo.

2 ¹Fana ano pesa maiya amo, repo makata watikisane nōmo maroporakano re kára kaýasapo. Asiamo nōmo re ararehoko peako asiane, re eféra hunia mahisinapaka repo taonea ano pesafapo. ²Asiāne ano peke re maroporakanone repo anoaki mahisihokosapo. Mahisirakano epamo ano masesehokosare? Re mahisiraka risike repo ano masesehokosafapo. ³Repo ano masesehoafunusa nine, asiāne repo taonea ano peraka aseane re watikiaka risikino asekea, ano himu mahisihoafunureapo. Anapaka repo makata watikisane maropohoasimo, nōmo reaki sawi poparaka makesapo. Ano seseraka rekeno, re soko seseraka risikiakosapo. Aiyaka nōmo hemakapurakaripo. ⁴Arirakano fana ano himu nekea hiripuyaki nōmo reaki sawi poparaka makesapo. Re himu mahisihoasimo nōmo reaki sawi poparaka makesafapo. Poremo isuaki himu tumurumo hemakapureapo, aihoasimo nōmo reaki sawi poparaka makesapo.

“Watikiaka rakisia aporoane fanasisane metakarinie,” aisane oyapo.

⁵Aporo hakássá metamo reaki makata umisa karakano asekea ano mahisirakanapo. Mahisinane ano hakasa mahisirakanafapo. Re soko mahisirakanapake. Asiāne nōmo someane kára somehokosafapo.

⁶Asiamo makata umisa kasá aporoane repo suamo e fanasisane sia fanasisapo. ⁷Asiamo pipu yumo fanasisane metakarikia eaki someraka, “Makata watikiaka rakisiante fanasisasamo pipu yumo mahisisane fasapo,” aihoanie. Epo kára himu nekea hemakapurane káranapaka e ararehoanie. ⁸Asiamo repo e hokono maka eaki someraka, “Isiapo né kára himu tumurumo hemakapurakanapo.” Aihoanie.

⁹Fana nōmo reaki sawi poparaka makesane, nōmo some suane repo kakimarakarihoamo aseako poparaka makesapo. ¹⁰Aporo metamo reaki watikiaka rakirakano asekea repo hisisane metakarikia watikisane mamerarurakano, nōmo soko epo watikisane mamerarurakanapo. Re seseraka risikiasimo Kereso hikumisi nenemea mamerarurakanapo. Aporomo watikiaka rakiraka tiki rakirakao, watikiaka rakisia nine nōmo mamerarurakanapo.

¹¹Isu yaiya hisiraka risikiasimo Satanemo hkokakakohoamo, aporo watikisane maroporaka mafarakanapo. Satanemo ipi makata aina watikisane isiapo asekea hemakupurasamo, epo isu asekea reke mokoatikinapaka, aporo watikisane maroporaka mafarakanapo. Arirakano Satanemo ipi hemakapukua rakirane isiapo himeterafaraka etenapaka isiapo isina ainane hemakapukua asekea risikinapo.

Toróase taonea Pore pusuane oyapo.

¹²Toróase taonea ano pusua maiya amo, aporomo Keresoane hemakapusimo some kotesane nōmo some kakako pusuapo. Pukua ano Toróase taonea pauraka aseane, ikia koro mapirisia ropaka amara ayíáka some kotesane some kakasimo ikia koro Kotimo ropakamarakano asesapo. ¹³Asiāne nōmo Keresoa paosa aporo mae Taetase ane nōmo kope pukua, e asekeanafonorakano nōmo someraka, “E masiarakapo.” Aíyaka kára hemakapuraka kope pukua Toróase aporo suaki ayaparaka i metakarikia, Masetónia hauaka á pusuapo.

Kotimo Poreane maseserakano Poremo Kotiaki kekeresane oyapo^b

¹⁴Isiapo suamo Kotiaki himu hakásaraka hemakapukua risiasamo isiapo Kotiaki suserakanapo. Isu Keresoaki kataka marekea risia aporoane Kotimo karikia purakanapo. Karikia puraka Kotimo Sataneane hurutapikia marokeraka wawaeraka apura ayíáka, isu karikia

^b 2:14-17 Kotimo Poreane masesesa kepoane 2 Korini 7:5-7 á meno hoanie.

purakanapo. Asiamo aporo hinamomo Keresoane hemakapusimo isiapo Yasu Keresoane some kape purakanapo. Asiamo Yasu Keresomo someane isiapo some akarane makata wape yamona asiapo.¹⁵ Asiamo aporomo makata wape yamona Kotimo yamohoasimo paikia akará ayíáka, Keresomo wape yamonane isupo. Wape yamona ayíáka isiapo Keresomo someane some karakanapo. Some karakano aporo metakiramo someane kakimarapo. Arirakano aporo metakiramo koaretaenapo.

¹⁶ Koaretaena aporomo isiapo some kasane, ipu kaikia someraka, "Some ane makata kusua ikiki yamona ayíáka ikiki yamoripo." Aíyaka hemakapusua aporoane kakaro kukusapo. Arirakano kakimara aporomo isiapo some kasane ipu kaikia someraka, "Someane isiapo kairaka, makata wape yamona ayíáka wape yamoripo." Aíyaka hemakapusua aporoane kakaro yaiya risikiakosapo. Arirakano someane some kakakosane epamo siaraka some karáre?^c

¹⁷ Arirakano aporo metakiramo mone mokoakosakipoko Kotimo someane some karaka, pisinisi arakira ayíáka some kape purapo. Ipu arakira ayíáka, isiapo mone mokoakosakipoko Kotimo someane ayíáka some karakanafapo. Kotimo isu murikimaka some kakako pusierakano, Koti hikumisia isiapo Keresoaki himu hakásaraka hemakapukua ayíáka, kakaro koteaka ereketae some karápo.

**Kotimo kawe someaka masane isiapo kekemaraka
Kotipoko rakiraka risiane oyapo.**

3 ¹Isiapo isina yano motosane makárahokosakipoko, isiapo reaki sawi poparakanafapo. Isiapo reane hokokerakanafapo. Arirakano Keresoa paosa aporo metakiramo ipu namina yano motosa makárasane sawia popasa maka peraka reaki someraka, "Isiapo someane kaiyinie." Aíyaka reaki sawiane tarikia, anakano repo ipu someane kaikia seserakano asekeea, i apura maiya amo ipu reaki someraka, "Isiapo koteaka rakisiapo. Aíyaka repo sawia poparaka isuaki makanie." Aíyaka aporoamo sawi popasane maka taripe purapo. Asiamo ipu arakira ayíáka isiapo ayíáka rakirafapo. Isiapo isina yano motosa makárahokosakipoko sawi aporo metamo popasane reaki tariako maka perafapo.

²Isiapo Yasuane some kasasamo, re Yasu Keresoaki risikiako parisapo. Asiasamo isiapo makata rakirane aporo suamo hemakapusimo re Keresoa paosane asekeasimoripo. Asiamo isiapo sawi popana ayíáka popasane re Keresoa paosa ayapo. Asiamo isiapo sawi popasane maka purafapo. Asiamo isiapo hokonomo sawi popasane maka perafaraka, isiapo himu hemakapurane reyaki reke, reane isiapo sawia popana ayíáka popasapo.

^c 2:16 Poremo iaki makata akai kaisiane, epo some pari kasane, repo hemakapusakipoko 2 Korini 3:5 á menohoanie.

³Isiapo makata rakisia aeyaka repo Yasu Keresoane kekemarakanapo. Asiasamo Keresomo sawi popasa ásiáne repo. Sawi ane Yasu Keresomo ekea popasafapo.^d Aporo hinamo himua popana ayiaka yaiya rera Kotiamo Ho Kotesa re himua murisia ayapo. ⁴Asiromo isiapo some amo kepoane oyapo. Kotimo isu murikimasasamo isiapo rakirapo. Isiapo Yasu Keresoaki kataka marekea risike, Kotiaki himu hakásaraka hemakapukua risike, isu mapiraraka risike somerakanapo. ⁵Isiapo koteaka rakiako, isiapo isina hemakapusua aeyaka isiapo wakapumo siahosifareapo. Isiapo siaraka rakisimo Kotimo wakapuane isuaki karápo. Karakano isiapo koteaka rakirakanapo. ⁶Kotimo ipi kawe someaka masane isiapo some kakasimo epo isu murikimokoa murireapo. Ipi hemakapusua kawe someaka masane, fana somemane motokoa popasa ayiáka popasafapo. Kawe yumo Kotimo Ho Kotesane isu himua marekea, Ho Kotesamo ipi yiamo isuaki somerapo. Arirakano fana Kotimo somemane popasane aporomo kekemahoanafonorakano aporoane kukusapo, aíyaka somemane fana motoreapo. Arirakano Ho Kotesamo aporo mafareahoko ararenapo.

⁷Arirakano fana somemane motosane Kotimo ekea poparaka Moseseaki kayereapo. Kasa maiya amo, maiya wakasemamo Moses hikumisia faesane reasasamo Isiraya aporomo aseraka, hi kakanoraka asekeasifareapo, aisapo. Arirakano somemane Moseseaki kasa maiya amo Mosesemo hikumisia faesane wakasema farape pukua, keseke faesane kakaro fasapo. Somemane motosa suane aporomo kekemahoanafonorakanone, aporo ane kukusapo, aíyaka popasapo. Asiáne somemaneane kasá maiya amo Kotimo faesayaki kasápo.

⁸Arirakano Kotimo Ho Kotesa kasá maiya amo Kotimo wakapu soko faesa namo kakaro kára kasapo. Somemanemo wakapuane soko, faesane soko, wakasemapo. Arirakano Ho Kotesamo wakapuane soko, faesane soko, namo kakaro kárapo. Somemane ane Ho Kotesamo marokesapo.

⁹Asiromo Kotimo fana someaka masa maiya amo aporoaki someraka, “Ní watikisapoko fanasihoko motoakosapo.” Aíyaka Kotimo Moseseaki somesa maiya amo faesayaki kasápo. Arirakano keseke Kotimo kawe someaka masa maiya amo aporoaki someraka, “Né maereketaerakanapo.” Aíyaka Kotimo Ho Kotesa kasá maiya amo namo kakaro faesayaki kasápo.

¹⁰Kawe namo kakaro faesamo sesakereraka, fana faesane makokórankanapo. ¹¹Fana maiya wakasemamo fana someaka masamo faesa sesakereraka reane, keseke kokórankano kesekeea kawe someaka masamo kawe faesamo fahoanafonoraka namo kakaro faeraka sesakererakanapo.

¹²Kotimo isuaki kawe someaka masamo faesane fahoanafononasamo isu mapiraraka risikinapo. ¹³Arirakano mapiraraka arisia ayiáka,

^d 3:3 Kotimo fana someaka masa Moseseaki kasane ekea popasapo.

Mosese mapiraraka reafapo. Mosese hikumisi faesa fahokorakano aporo hinamomo aseakohoamo, Mosesemo pasu yahanasa maka e hikumisia karotapisiapo. ¹⁴ Arirakano fana Isiraya aporomo Mosesemo somemane kaisia nine, ipu koteaka hemakapusuafapo. Koteaka hemakapunafonoraka ipu himu hemakapurane pasumo karotapisia ásiapo. Fana soko yumo soko, Kotimo fana someaka maraka sawia popasane ipu menoraka hemakapurakanafapo. Arirakano pasumo karotapisiane sakaremakasimo, aporo hinamomo Yasu Keresoaki himumo kataka marekea risikino, pasu yahanasamo karotapisia ayiáka himua karotapikia risiane Keresomo ipi sakaremasapo.

¹⁵ Yasu Keresomo sakaremakosapoko asiane ipu Kotiaki himu hakásaraka hemakapunafonoraka Mosesemo somemane popasane aporomo pipu yia menosane merarunapo. Pasumo karotapisia ayiáka i himua karotapisiasamo ipu himumo sawi popasa kepoane hemakapurafapo.

¹⁶ Asiāne Keresoaki aporo hinamo metakira Unihae Keresoaki risikiako parirakano, pasu sakareamara ayiáka ipu himura karotapikia risiane sakaremrapo. ¹⁷ Aporo hinamomo Unihaeaki risikiako parirakano, Ho Kotesamo i himua pasumo ayiáka karotapisiane sakaremakenap. Asiamo aporo hinamoane somemanemo tipura kesa asia risiane, Ho Kotesamo iane makokorotaesapo. Makokorotaerakano aporoane seseraka risikiakosapo. ¹⁸ Arirakano Unihaemo ipi faesamo isu ruraka isu ho piakae piakaerakanapo. E ipi area ayiáka risikiasimo ipi faesane isuaki karakanapo. Fana wakasema faeraka risiane, keseke kára faehoasimo Unihaemo rakirakanapo. Unihaemo ipi Ho Kotesamo rakiraka rekenapo.

**Kotimo some kotesa faesa asiane isiapo some
kakasimo, Kotimo isu murikimasane oyapo.**

4 ¹ Kotimo isuaki yaku arareraka, epo ipi someane some kakasimo, isu murikimasapo. Asiasamo isiapo Kotimo makata rakirane yaiya rakiraka risike isu himu fahokosafapo. ² Kotimo isuaki makata rakiniesane, makata kaýasa rakirane soko, makata mahamekeea rakirane soko, isiapo metakarisiapo. Asiamo metakarisiane tau mahoperaka arakira ayiáka isiapo rakirakanafapo. Kotimo someane isiapo some karaka, sanasiraka kotafe hokoa some karakanafapo. Asiamo Koti hikumisia ipi someane isiapo kakaro hufitaeraka some karakanapo. Some karakano aporo suamo kaikia, someane kakaroripo, aíyaka hemakapusimo, isiapo kakaro some karakanapo.

³ Ayiáka some karakano, aporo hinamo metakiramo kairaka someraka, "Someamo kepoane isu himeteripo." Aira aporo hinamoane Heao hauaka á pukusapo. ⁴ Aíyaka somera aporo hinamoamo Kotimo someane kakimarafapo. Kakimakanafonona aporo hinamoane, Satanemo i himua

makatosapo. Makatosasamo ipu himumo Kotimo some kotesane kakaro hemakapurafapo. Yasu Keresoane Koti tati hakása yinesapo. Tetapō tati faesa kotesane isiaipo some karakano, ipu hemakapukohoamo, himu hemakapurane hauaka omo unihae Satanemo makatosapo. Makatosasamo, Kotimo faesane ipu hemakapurafapo. Kotimo some kotesane soko ipu hemakapurafapo.

⁵ Arirakano isiaipo isina yano motosane makáraraka some karáfapo. “Yasu Kereso ipi unihaeaka rekenapo,” aíyaka isiaipo some karapo. Some karáka aporo raipamo arakira ayíáka isiaipo repoko rakirakanapo. Isiaipo Yasu Keresoaki hemakapukua reaki some karakanapo. ⁶ Arirakano hauaka one kepomaresa maiya amo Kotimo someraka, “Katosane faerasie.” Aisa Kotiamo isu himua mafaesapo. Asiamo isiaipo hemakapuane, isiaipo Yasu Kereso asekea Kotimo faesane soko, wakapuane soko aserapo.

Poreane kára mokoatikisa nine Kotimo araresane oyapo.

⁷ Isiaipo makata mahimunane akúa kerapo. ^e Akú ane keseke potakahekea watikihokosapo. Aina ayíáka Kotimo ipi Ho Kotesamo makata aina kotesane isu himua kesapo. Arirakano isu aporomano kauane keseke toreraka fahokosapo. Asiamo Kotimo hemakapuraka, aporo hinamo suamo asekea hemakapusimo Kotimo wakapuane soko, faesane soko, isu hauaka aporoaki karakanapo. Isiaipo arakirane, isiaipo isina wakapu anaka rakirakanafapo. Kotimo wakapu anaka rakirakanapo.

⁸ Kotimo wakapuane isuaki karakano, aporo metakiramo isuaki yunuraka risike isuane mokoatikinapo. Asiāne Kotimo isu ararerakano ipu isu mahurutapisiasfapo. Arirakano maiya metakiramo isuane kára hemakapukua mahimeteraka risiaipo. Asiāne Kotimo isu ararerakano isu hurupesafapo. ⁹ Arirakano aporo metakiramo isu ruko kekemaraka mokoatikirakano yia, Kotimo isu metakarisiasfapo. Arirakano aporo metakiramo isu rusua hauaka warisiane kusuafapo. Asiāne Kotimo isu ararerakano, isu takahikia pusuapo. ¹⁰ Asiamo Yasu makusua ayíáka, maiya suamo isu makukusakipoko aporo metakiramo isu mokoatikirakanapo. Yasu maturikia taerakano turikia pukua reasasamo, ipi wakapuraka rerane isuaki karakano, isu soko wakapuaka risikinapo.

¹¹ Maiya suamo isiaipo Yasupoko rakirakano, asekea aporo metakiramo isu rusuapo. Rusua kusuahopo. Rusua kusuahonine isu fore risira kaua Yasumo wakapuane reasasamo, repo asekeasimo isu yaiya arisia yuyapo. ¹² Asiamo isiaipo Yasuane some karakano, aporo metakiramo isu rusua

^e 4:7 Paeporo Pukua á hauakamo orotipi rakisia popasane, isiaipo hauakamo orotipi rakianafononasamo, isiaipo akú popasapo.

kukusakipoko asiane kusuafapo. Asiāne isiapo some kasáne repo kaikia Yasuaki himu hakásaraka yaiya risikiakosapo.

¹³ Arirakano Kotimo sawia popasane oyapo. "Nōmo Kotimo someane kakimasasamo some karakanapo." Aíyaka popasa aporoamo Kotiaki himu hakásaraka hemaka apura ayiáka isiapo soko Kotiaki himu hakásaraka risike, ipi some kakimasasamo some karakanapo. *(Buk Song 116:10)*

¹⁴ Isiapo hemakapuraka, "Unihae Yasuane Kotimo maturikia taesapo. Asiamo Koti amo isu soko Yasuaki kataka maresa aporo hinamoane, maturikia taehokosapo. Maturikia taerakano isu soko, re soko, Koti hikumisi nenemea risikiasimo pasimokoakosapo." Aíyaka hemakapurakanapo.

¹⁵ Arirakano isiapo makata arakirane soko repoko rakirakanapo. Asiamo isiapo makata rakisiakipoko isu mokoatikinane soko, repoko isu mokoatikirakanapo. Mokoatikirakano yia repoko yaiya rakiraka risikinapo. Kotimo aporo hinamo yakai ararehoasimo, aporo hinamo yakaiaki isiapo some karakanapo. Some karakano, aporo hinamo yakai Kotiaki risikiako pariraka ipu Kotimo ararenane hemakapuraka eaki suserakanapo. Suserakano aporo hinamo metakiramo Kotiaki risikiako pariraka eaki susenane kárahokosapo. Kárasakipoko Kotimo yano motosa makárarakanapo.

Kotiaki himu hakásaraka rerane oyapo.

¹⁶ Asiamo isiapo Koti makama fanahokosakipoko, isiapo makata rakirane hisiraka metakarirakanafapo. Isu kau hákasa sisimarakanapo. Asiamo maiya suamo isu himu soko, ho soko, Kotimo makaweraka marerakanapo. ¹⁷ Arirakano yumo maiya wakasemamo isu mokoatikisane wakasemareapo. Akipoko keseke Kotimo isuaki fahoanafonona faesa kára kakakosapo. Namo kakaro faesane makosakipoko, mokoatikina makatane isiapo hemakapurakanafapo. Makata ane, faesa amo marokehokosapo.

¹⁸ Asiamo makata hímo aserane kára hemakapurakanafapo. Makata asekeanafonona makata akipoko kára hemakapurakanapo. Makata hímo aserane maiya wakasema nina keseke fahokosapo. Asiāne makata himo asekeanafononane yaiya rekeakosapo. Yaiya rekeakosa makata akipoko isiapo kára hemakapurakanapo.

Isu kurakano hepene apea Kotimo isuaki kau kotesa kakakosane oyapo.

5 ¹ Isu hauaka wo arisiane farae apea arisia ayiáka risikinapo. Homo apeane isu kau ayapo. Arirakano farae ape rakaritaeana ayiáka isu kau kukusa ayapo. Isu kau kurakano isiapo hoane yaiya risikiakosakipoko, Kotimo hepene yapura ape asiane kau hitafe haku mako hiakosa ayapo. Asiamo apeane namo kakaro apefapo. Ape asiane kau haku yaiya risikiakosa kau ayapo. Asiamo kauane fahokosafapo.

² Arirakano isiaipo someraka, “Isu hauaka one metakarikia, hepene yapura hiakoripo. Hepene yapura kau kawe haku mokoako hiakoripo.” Aíyaka hemakapuraka kára seserakanapo. Asiamo isu hauaka wo risike kau nenakarane hisiraka, hauaka wo metakarikia, hepene yapura kau haku yaiya risira ane Kotimo kakakosane seserakanapo. ³ Arirakano isiaipo pasu osona ayiáka hepene yapura kau haku yaiya risira kauane mokoa osohokosapo. Arirakano aporomo pasu horotaeraka patera yase arisia ayiáka, isiaipo hoane ayiáka risikiakohoamo pasu osona ayiáka, isu kau hitafe haku mokoa osohokosapo. Isu kauyaki hoyaki hakása sarimaraka risikiakosapo.

⁴ Hauaka wo farae ape asiane isu aporomano kau ayapo. Kau one arisia maiya amo makata umisa maka puraka, umirakano kanahiraka maka apura ayiáka, isu ayiáka puraka risikinapo. Arirakano isiaipo pasu ososane horomorakanone isu patera yase risirapo. Isiaipo ayiáka rakiane siahoadifareapo. Asiáne pasu kaweane kima yapura osoraka pasu paté fana ososane horomarapo. Aina ayiáka isiaipo kau kawe haku yaiya risira kauane osoraka, hauaka omo kau patéane horotapiakosapo. Asiamo maiya suamo isu kau haku kotesayaki yaiya risikiakosapo. ⁵ Asiamo yaiya risira kauane mokoakosakipoko isu meraruamo risikiakohoamo Kotimo isuaki tarirakanapo. Tariraka Kotimo isuaki someraka, “Keseke yaiya risira kauane nōmo reaki kakakosapo.” Aíyaka fana Ho Kotesane kasapo.^f

⁶ Kotimo Ho Kotesa kasasamo maiya suamo isu paroaka risikinapo. Isu kau one arisia maiya amo, Kotimo apea Unihae Yasuyaki hakasa risikinafapo, aíyaka hemakapurakanapo. ⁷ Asiamo isiaipo Unihae Yasuane asekeanafonoraka yia isiaipo Kotiaki himu hakásaraka hemakapukua rakiraka risikinapo. ⁸ Asiamo keseke Kotimo isu makotehokosapo. Aisasamo isu paroaka risikinapo. Asiane isu kukua kau one metakarikia, hauaka one metakarikia, Unihaemo apea hiako seserakanapo. Asiamo maiya suamo Unihaeyaki risikiako namo kakaro seserakanapo. ⁹ Asiamo isu hauaka wo arisiamo soko metao, hepene yapura hikia arisiamo soko metao, maiya suamo Kotimo sesehoasimo hemakapurakaripo. ¹⁰ Asiamo keseke aporo hinamo su Keresomo takekea parakuana maiya amo, e rea isu su pukua sarimahokosapo. Sarimaraka isiaipo hauaka wo risike makata rakisiakipoko, makata ropo siaraka mokoakosapo. Makata watikiaka rakisiakipoko, ropo watikisané mokoakosapo. Arirakano Koteaka rakisiakipoko, ropo kotesane mokoakosapo.

**Isiaipo Kotiyaki yunuraka risiane Yasu Kereso
kusua aeyaka Kotimo isu tákесane oyapo.**

¹¹ Unihae Kotiane karasasamo isiaipo eane namoraka hemakapukua rakirapo. Asiamo aporo metakirane Kotiaki risikiako parihoasimo isiaipo

^f 5:5 Hinamo fairaka fana sekete soko karáka someraka, “Hinamo fitu keseke kakakosapo.” Aíyaka somera ayiáka Kotimo Ho Kotesane isuaki fana kasapo.

paroaka wakapuaka some karakanapo. Arirakano isiaipo aina kotesane Kotimo aserakanapo. Asiamo repo soko, isiaipo aina kotesane asekeasimo hemakapurakaripo.

¹² Asiamo isiaipo isina yano motosane makama mafaraka somerakanafapo. Isiaipo reane kirimarakanafapo. Isiaipo ainane repo koteaka hemakapusimo isiaipo sawi one poparakanapo. Arirakano aporo metakiramo namina rupiaka some karaka, Kotimo sesehoasimo rakirafapo. Asiane ipu aina amo, Kotimo sesehoasimo rakirafapo. Ipu namina hemakapusuane some karapo. Asiamo aporoamo isu hokomaka somerakano repo isiaipo rakira ainane hemakapuraka iaki somehokosapo. ¹³ Aporoamo isuane hokomaka someraka, "I masuaraka risikinapo," aisapakae. Asiamo isu masuaraka risike yia, isiaipo Kotipoko himu hakásaraka rakirakanapo. Arirakano isiaipo repoko farimaka arakirane isu masuaraka rakirakanafapo. Asiamo isiaipo makata arakiramo kepoane oyapo. ¹⁴ Yasu Keresomo isuaki namo kakaro himu tumurumo hemakapurapo. Keresomo himu tumurumo hemakapurane isiaipo himua komarukua risiasamo, isiaipo ayiáka rakirakanapo. Arirakano aporo hinamo supoko Yasu Kereso ipi hákasa farimaka kusuapo. Aporo hinamo supoko e kusuasamo, aporo hinamo su e kusua ayiáka, kusuapo. ¹⁵ Aporo hinamo supoko e kusue, aporo hinamomo ipu namina mena akipoko rakisimo, e kusuafapo. E kusua maturikia taerakano turikia pusuane, e ipipoko ipu rakisimo, e kusuapo.

¹⁶ Arirakano fana aporo kau kima isiaipo aseraka hauaka omo hemakapusua aeyaka isiaipo someraka, "Aporo metane kotesapo. Aporo metane watikisapo." Aiyaka hemakapusua nine, yumo isiaipo metakarisiapo. Fana isiaipo Keresoane kau kima aseraka hauaka wo hemakapusua aeyaka eane hemakapusuapo. Asiāne yumo Keresoane ayiáka hemakapurakanafapo.

¹⁷ Asiamo aporo hinamomo Yasu Keresoaki rekeako pariraka, Keresoaki kataka marekea risia aporo hinamoane, Kotimo makawenapo. Namina fana aina watikisane metakarikia, yumo kawe kotesa risikinapo. ¹⁸ Fana isiaipo Kotiaki yunuraka risiaipo. Asiāne Yasu Kereso kusua aeyaka Kotimo isu mafasikia, isu tákeraka risikiasimo maresapo. Arirakano Kotimo isuaki someraka, "Aporo hinamo metakiramo anoaki tákeraka risikiasimo repo somehoko pusie." Aiyaka Kotimo isuaki someaka maresapo. ¹⁹ Someaka marerakano isiaipo someraka, "Aporo hinamo suamo Kotiaki yunuraka risiane, Yasu Kereso kusua aeyaka mafarakano, tákeraka risikiasimo, Kereso Koti tetapō rakisiapo. Asiamo aporo hinamomo watikisane Kotimo efera hunia hemakapusafapo." Aiyaka aporo hinamomo Kotiaki tákeraka risikiasimo isiaipo some karakanapo. Some kakasimo Kotimo isu murikimasapo.

²⁰ Murikimarakano isiaipo Keresopoko some kape purakanapo. Asiamo isiaipo some akara aeyaka Kotimo aporo hinamoaki some karakanapo.

Asiamo isiapo some karaka, “Kereso repoko kusuasamo, repo Kotiaki yunuraka risiane metakarikia, Kotimo mafasirane hemakapukua Kotiaki tákera ka risikianie.” Aíyaka isiapo some karakanapo. ²¹ Arirakanó Kereso ipi ereketae susu reke, watikiaka rakisiafapo. Epo watikiaka rakianafonosa nine, isiapo watikisane epo maka, e watikisa pariraka, isupoko kusuapo. Isiapo Keresoaki kataka marekea risike, isu ereketae risikiasimo, Yasuane watikisa pariraka kukusimo Kotimo maresapo. Koti ereketae susu area ayíáka, isu ereketae risikiasimo epo hemakapukua maresapo.

**“Kotimo hemakapukua yaku ararenane repo
metakariakopo,” aisane oyapo.**

6 ¹Isiapo Kotiyaki hakása rakiraka risike, reki paroaka somerakanapo. Kotimo re hemakapukua yaku ararenane, repo mosane hemakapuraka, “Makata ane nenakamaka makatareapo,” aíyaka hemakapukupo. ²Fana Kotimo somerakano porofete aporomo kaikia popasane oyapo.

“Nōmo re yaku ararehokosa ikia karane ropakataesapo. Repo anoaki mafasisiesa maiya hakása yiamo nōmo re mafasisiapo. Asiamo nōmo reane ararehoasimo, repo anoaki wása maiya amo nōmo kaisiapo,” aíyaka popahoareapo. *(Aisaia 49:8)*

Asiamo isuane Kotimo yaku ararehokosa ikia kara ropakataesane yaiya kakenapo. Mafasiakosapo aíyaka fana popasane, pipu yumo soko yaiya kakenapo.

**Kotimo makata rakirane Poremo rakisiasamo
aporomo eane mokoatikisane oyapo.**

³Repo isuaki someraka, “Repo watikiraka rakirakanapo,” aihokohoamo, isiapo repoko rakiraka, ikia kara makata matasosakipoko terafaka arura ayíáka, terafaka rusimo, matasoraka arakira ayíáka, isiapo mokome some kaka rakirakanafapo.

⁴Isu Kotimo aporo raipapo, aíyaka repo asekea hemakapusimo, isuaki aporo metakiramo mokopipirakanó, isiapo Kotiane metakirakanafapo. Isu Kotiyaki wakapuraka risikinapo. Wakapuraka risike isu mokoatikirakanó soko, ⁵rurakanó soko, tipura kerakanó soko, isuaki sapehoasimo kirimarakano soko, mawaforo marerakanó soko, yaiya mekéraka risike, Kotipoko wakapuraka rakirakanapo. Rakiraka risike, waforosasamo ereamo wakanafonoraka, arirakanó makata soko nanafonoraka himuraru ayíáka risike yia, isiapo Kotiane metakirakanafapo.

⁶Arirakanó isiapo ereketae hemakapukua risike, arirakanó makata kepo koteaka hemakapukua risike, arirakanó aporo metakiramo isu

mokoatikirakano soko, isiapo sapehoanafonoraka risike, arirakano aporo hinamo metakira arareraka makoteraka risike, isu Kotimo aporo raipane isusasamo aporo metakiramo isuane asekeasimo, isiapo ayíáka koteaka susu rakiraka risikinapo. Asiamo Ho Kotesa isu himua risikirakano, aporo hinamo suane isiapo himu tumurumo hemakapurakanapo. ⁷Kotimo kakaro someane isiapo some karáka risike, Kotimo wakapu amo isu ararerakano, isu koteaka risikinapo. Ereketae susu rerane asi tare asíapo. Hokono tumurumo maka, hokono kasakaimo soko maka area ayíáka, ereketae susu rerane maka rekenapo.

⁸ Arirakano aporo metakiramo isu makáraraka, arirakano aporo metakiramo isu mawakasemarakanaapo. Arirakano aporo metakiramo isuaki someraka, “Re aporo kotesapo,” airapo. Arirakano aporo metakiramo isuane hokomaka somerapo. Arirakano aporo metakiramo isuaki someraka, “Repo kotafe somerakae,” airapo. Aisa nine isiapo namo kakaro susu somerapo. Aporo metakiramo isu mokoatikirakano yia, isiapo Kotimo kakaro someane metakarirafaraka yaiya some karakanapo.

⁹ Arirakano aporo metakiramo isu asera nine isu aseraka makefenapo. Arirakano aporo metakiramo isu rusua kusuahonine, isu kusuafapo. Arirakano isu rurakano soko isu kusuafapo. ¹⁰Arirakano aporo metakiramo isu mahisihosimo rakirakano yia, isu seseraka risikinapo. Arirakano isu makata kemo faraka risike yia, mahimuraka yaiya rekeakosa makata kemoane aporoaki isiapo karápo. Arirakano isu makata kemo forokoa risike yia makata suane isiapo menapo.

¹¹ Korini aporo hinamo reo, isiapo reakti hufitaeraka somerakanapo. Isiapo re himu tumurumo hemakapurukua re ararehoko hemakapurakanapo. ¹²Isiapo re ararehoko hemakapurane metakarirakanafapo. Asiane repo isuaki hemakapurane matasorareapo. Asiamo isina yia himu hakásaraka hemakapurakanafapo. ¹³Isiapo soko reane ararehoko hemakapura yaiya, repo soko isuaki ararehoko hemakapunie. Aíyaka aporomo ipi hokosaki some akara ayíáka, nōmo reakti ayíáka some karakanapo.

**“Keresoa paohoanafonosa aporo hinamoyaki hakāsa
sarimaraka rakiakopo,” aisane oyapo.**

¹⁴ Keresoa paosa aporo hinamoyaki, nena aporo hinamoyaki, hakāsa sarimaraka rakipe pukupo.⁸ Arirakano makata kotesayaki makata watikisayaki sarimanafapo. Kepo hakásafapo. Arirakano faesayaki katosayaki sarimaraka hakāsa risirafapo. ¹⁵Arirakano Keresope Satane

⁸ **6:14** Aporo tetámo makata ira paka puraka meta horopo meta kitake asia tati ira paka purafapo. Makata rakiakosakipoko aporo tetá tati siasi rakirapo. Aina ayíáka aporo tetá Keresoa paosa tati rakiante siahoasireapo.

tati sarimaraka hakāsa tákera ka risirafapo. Asiamo Keresoa paosa aporomo Keresoa paohoanafonosa aporo tati makata hemakapurane hakāsa ninesafapo.

¹⁶ Arirakano Kotimo apeane soko yatafu yakasa ho menane soko, tati hakāsa ninesafapo. Yaiya rera Kotimo apeane isu supo. Arirakano Kotimo somesane oyapo. “Re suane nōmo aporo hinamopo. Asiamo repo Kotiane anopo. Ano reyaki hakāsa rekeakosapo.” Aíyaka Kotimo somerakano popahoareapo. (*Wok Pris 26:12; Jeremaiia 32:38; Esekiel 37:27*)

¹⁷ Arirakano maiya metamo Unihae Kotimo someraka, “Nena aporomo hemaka apura ayiáka repo hemakapukohoamo re fasikia risikianie. Fasikia risike ipu aina watikisane kekemahoanafonorakano, nōmo re pasimokoa karikia nakosapo.” (*Aisaia 52:11; Esekiel 20:41*)

¹⁸ Karikia nenaka nōmo reaki someraka, “Repo atane anopo nōmo aporo hokosane soko nōmo hinamo hokosane soko repo,” aihokosapo. Aíyaka Unihae Koti káramo somerakano popahoareapo.

(*2 Samuel 7:14; 7:8*)

7 ¹Hameo, repo ata anosasamo Kotimo ayiakakosapo aisane aporo hinamo fana risiaki soko, isuaki soko somesapo. Asiamo isu kau mawatikinane soko, isu ho mokoatikinane soko isiapo metakarinie, airakaripo. Kotiaki namoraka risike makata watikisane kikisiraka koteaka susu rakiraka risikianie, airakaripo.

Poremo sesesane oyapo.

² Repo namina aporo tákene hemaka apura ayiáka, isuane soko ayiáka hemakapunie. Isiapo reane mokoatikisafapo. Repo watikiaka rakisimo isiapo reaki hkokasafapo. Repo makata meta isiapo hakimasafapo.

³ Nōmo sawi one poparaka nōmo reaki hukurukua someraka, “Re aporo watikirareapo,” airakanafapo. Fana nōmo reaki someraka, “Re nōmo kára hemakapurakanapo.” Aisane yaiya hemakapurakanapo. Ano akura maiya amo soko, nōmo re yaiya hemakapukusapo. Ano hitafe area maiya amo soko, reane hemakapurakanapo. ⁴Nōmo reaki himu hakásaraka hemakapurakanapo. Asiamo reane nōmo aporo metakiraki kekereraka somerakanapo. Makata umisa fasereperakano isiapo reane hemakapukua sesenane komarukua risikinapo.

⁵ Fana Masetónia hauaka á isu pukua risia maiya amo, isu fenesafapo. Ape sumu á aporo watikiaka risia aporo yaki pekea isuaki sapemeraka mokoatikisapo. Mokoatikirakano asekea isiapo hemakapuraka, “Mayiakanarakapo,” aíyaka isu himu faraka risiapo. ⁶Asiamo aporo himu faraka risiane mapirahoasimo Kotimo kamenakaraka ararena ayiáka isuaki soko kamenakaraka araresapo. Kotimo araresa aeyaka Taetase isu risia perakano asekea kára sesesapo. ⁷Taetase perakano isu seseraka, arirakano epo some kasane soko, isiapo kairaka kára

sesesapo. Epo isuaki some kasane oyapo. Repo e masesesapo, airakasupo. Arirakano repo ano aseako seserakanapo, airakasupakae. Arirakano repo makata watikiaka rakisiane hisiraka metakarikia, arirakano ano patera aseako hemakapurakanapo, airakasupakae. Airakano nōmo kaikia kára sesesapo.

⁸ Fana re maropohoasimo nōmo reaki sawi poparaka makesapo. Poparaka makesane repo menoraka mahisisaporakano, nōmo kairaka fana sawi katuaka poparaka makeapo, aíyaka nōmo hemakapusuapo. Aíyaka wakasema nina, keseke efera hunia kaiyiáne, repo makata watikisane metakarikia Kotiaki himu hakásaraka hemakapukua risikinaporakano kairaka, ano seseripo. Katuaka poparaka makeapo aíyaka hemakapusuane, yumo aíyaka hemakapurakanafapo. ⁹ Re mahisiraka risikinaporakano nōmo kairaka, ano soko seseraka reafapo. Asiāne yumo ano seserakanapo. Nōmo sawi poparaka makesane repo aseraka mahisiraka kaíyaraka hemakapusuapo. Mahisiraka kaíyaraka hemakapurane Kotimo kaka, epo re yaku ararerakano, repo makata watikisane hufitaeraka metakarikia, efera hunia Kotiaki hemakapukua risikinaporakano nōmo kaikia kára seserakanapo. Asiamo repo watikiaka rakisiane maropohoasimo, nōmo sawi poparaka makesamo reane mokoatikisafapo. ¹⁰ Arirakano aporomo watikiaka rakirakano, kaíyaraka hemakapurane ipi himua Kotimo mahemakapurapo. Asiamo aporoamo ipi hufitaeraka makata watikisane metakarikia, Kotiaki rekeako parirakano, Kotimo eane mafasiakosapo. Asiamo aporo metamo e maroposasamo epo mahisinafapo. Arirakano nena aporomo watikiaka rakirakano kaíyaraka, hufitaeraka makata watikisane metakarianafonoraka aporoamo hauaka omo hemakapusuane kekemaraka rekeno, aporoane akuramo, Kotiyaki yaiya rekeakosafapo.

¹¹ Kotimo re ararerakano repo hemakapuraka katuaka rakiapo, aíyaka hemakapukua makata watikisane metakarisiapo. Metakarikia re kakaro koteaka risikiakosakipoko hemakapukua risikinapo. Aporo metamo re asekea hokorehokohoamo repo watikisane foaka metakarieapo. Repo makata watikisane asekea mahisiraka risiapo. Arirakano repo makata watikisane kárahokohoamo namoraka risiapo. Asiamo repo isuaki tákéhoko hemakapukua risiapo. Repo ano hikumisi aseako hemakapukua, repo watikisane nōmo asekea maropohokosapo, aíyaka repo hemakapurakayiapo. Asiamo aporoamo makata watikiaka rakisiane repo maroporaka fanasisapo. Aporoane repo fanasisasamo makata watikisa amo kepoane fasapo. Asiamo makata watikisa ane repo maroporaka fasane kotehoareapo. ¹² Nōmo reaki sawi popasa amo kepoane oyapo. Kotimo reane himu tumurumo hemakapusuasamo makata aina watikisamo reane mokoatikirakano Kotimo mahisisapo. Asiamo makata watikisane metakarikia, makata aina kotesane

kekemaraka rakisimo, Kotimo hemakapurakanapo. Arirakano Koti hikumisia nōmo someane repo kaikia hemakapuraka risikiasimo, nōmo sawi ane popasapo. Asiamo aporo repo namina yia aporo yako meta mokoatikisapakano, eane maropohoasimo nōmo sawi ane popasapo.

¹³ Arirakano nōmo sawi popasane repo kekemaraka, repo isuaki yaiya hemakapukua risikinapo, aíyaka nōmo hemakapurakanapo. Asiamo isu seseraka risikinapo. Arirakano Taetase repo apea pesamo repo watikisane metakarirakano asekea, Taetase isu risia wo pekea, e himu nesane faraka perakano asekea isu soko kára seserakanapo. ¹⁴ Fana nōmo Taetaseaki reane kekereraka somesapo. Repo e masesesakipoko nōmo reane kekereraka ano kaiyarakanafapo. Ano reyaki rea maiya amo nōmo reaki someraka, “Re aporo kotesapo.” Aíyaka re nōmo kekeresane nōmo kakaro somesapo. ¹⁵ Arirakano yumo epo reaki kára seseraka hemakapurakanaporakae. Fana re fofaraka risike, e pasimaka epo some kasane kekemarakano, epo reaki kára seseraka hemakapurakanaporakae.

¹⁶ Asiamo nōmo hemakapuraka, “Repo Kotimo some kakimasane yaiya kakimaka risikiakosapo,” aíyaka nōmo hemakapurakanapo. Hemakapukua kára seseraka rekenapo.

Keresoa paosa aporo hinamo ararehoko mone taenane oyapo.

8 ¹ Maeo, nōmo some meta one soko, reaki some karakanapo. Keresoa paosa aporo Masetónia hauaka wo risiane Kotimo hemakapuraka ararerakano, ipu rakisiane yumo nōmo reaki poparakanapo. ² Arirakano makata umisa iaki kára fasereperakano, aporo metakiramo iane mokoatikirakano yia, ipu Kotiane metakarisiafapo. Metakarianafonoraka i makata forokoa risike yia, ipu himumo kakaro seseraka hemakapusua aeyaka, aporo hinamo metakirane arareraka mone kára karakasupo.

³ Mone kára kaka ipu mone kakakosapoko taesane soko karáka yia ipu namina mena taesane soko kima ripaka kára karakasupo. Namina hemakapukua ayíáka karakasupo. Ipu kasane nōmo asekea kakaro somerakaripo. ⁴ Arirakano ipu someraka, “Yutía hauaka á Kotimo aporo hinamo makata forokoa risiasamo isiapo iane ararehoko seseripo.

Keresoa paosa aporo hinamo sése ape metakira á risiamon iane ararena ayíáka, isiapo soko ayíáka ararehoko seseripo. Asiamo isiapo mone sarimaraka Yutía aporo hinamoaki kakasimo néaki kakakosapo. Néaki karakano nōmo someraka, ‘Nōmo mokoakosafapo,’ aihokopo.” Aíyaka ipu anoaki aofiraka somerakasupo. Ipu arareraka mone kakako kakaro seserakanapo, airakasupo.

⁵ Airakano isiapo hemakapuraka, “Ipu mone kakakosapo.” Aíyaka hemakapusua nine ipu mone hákasa kasafapo. Mone kakasiraka risia maiya amo ipu someraka, “Isu isinane Unihae Kotiaki karakanapo.” Aíyaka efera hunia ipu someraka, “Kotimo someaka maresane Poremo

isuaki somerakano isiapo rakiakosapo.” Aíyaka ipu kára seseraka somerakano kaikia, ipu kasá ayíáka repo soko ayíáka kakasimo nōmo hemakapurakaripo.

⁶ Asiamo repo taonea nōmo Taetaseane efera hunia pusierakanapo. Asiamo fana Taetase reyaki rea maiya amo, Yutía hauaka Keresoa paosa aporo hinamoane ararehokosakipoko, fana moneane epo kepomarekeanarimasapo. Sarimasakipoko repo mone yaku kakakosane kaka fahoasimo repo taonea epo sarimahoasimo nōmo pusierakanapo. ⁷Repo makata kára rakiraka risikinapo. Repo Kotiaki himu hakásaraka hemakapurakanapo. Arirakano Kotimo someane soko repo some karakanapo. Arirakano Kotimo some kepo suane repo hemakapurakanapo. Arirakano aporo metane repo ararehoko seserakanapo. Arirakano isuane soko repo kára hemakapurakanapo. Repo ayíáka koteaka rakirasamo repo mone akaramo kára kakasireapo.

⁸ Repo kakanie, aíyaka nōmo somerakanafapo. Asiāne aporo metakiramo seseraka mone kasapo, airakanapo. Aíyaka repo aporo metakiraki himu tumurumo hemakapurane nōmo asekeasimo, repo soko seseraka mone kakasimoripo. ⁹Arirakano Unihae Yasu Keresomo isuane kára hemakapukua yaku ararenane repo hemakapunie. Makata su ipi mena nine makata suane ipi mahimurafaraka ipi isupoko hauaka wo peraka makata forokoa koraka reapo. E makata forokoa reke araresa aeyaka isu koteaka seseraka hemakapukua risikinapo.

¹⁰ Arirakano nōmo hemakapusuane oyapo. Fana Keremisi hakása fasamo repo kepomarekeanamone sarimaraka risiane, yumo kaka fahoanie. Apromo fana mone kakakosane someraka, “Isiapo aporo hinamo metakira ararehokosakipoko mone kakakosapo.” Aíyaka repo fana hemakapukua kasapo. ¹¹Ayiáka kasane, yaiya karáka risikianie. Tipia metakariakopo. Mone metakira taesa tokenone, moneane mokoa kakanie. Repo namina kakako hemakapusuane kaka fahoanie. ¹²Repo mone suane Kotimo aserapo. Mone tokeno asekea parakuraka sape meta Kotiaki seseraka karakano, Kotimo asekea sesehokosapo. Arirakano metamo namo kakaro mone fasamo kakanafonorakano Kotimo sapehokosafapo.

¹³⁻¹⁴ Arirakano repo hemakapuraka, “Poremo aporo metakiraki someraka, ‘Yutía aporoane ararehoanie.’ Aíyaka somehoanafonoraka isuaki hákasa maiya suamo epo someraka, ‘Repo mone kakanie.’ Airakane mairakariakapo.” Aíyaka repo hemakapukupo. Reaki nōmo maumi marerakanafapo. Yumo repo mone kára tokeno asekea airakaripo. Tokeno, asekea aporo makata forokoa risiane repo ararehoafunupo. Ararerakano, keseke re soko makata forokoa arisia maiya amo, ipu soko re ararehokosapo. Arirakano repo i ararerakano, ipu soko re ararehokosapo. Ayíáka repo namina yia ararerakano, re su siaraka

risikiakosapo. ¹⁵ Arirakano aporo metakiramo aporo metakiraki araresane Kotimo sawia popasane oyapo.

“Makata nakosa kára mosa aporomo aporo metane arareraka karaka, kina taesafapo. Arirakano makata nakosa wakasema mosa aporoane soko meamosafapo,” aiyaka popahoareapo. *(Kisim Bek 16:18)*

Korini taonea Taetasepe aporo meta teta Poremo pusiesane oyapo.

¹⁶ Nōmo re ararehoko hemaka apura aiyáka Taetasemo reane aiyáka ararehoko hemakapurakanapo. Hemakapurane Kotimo Taetaseaki karakano nōmo Kotiaki suserakanapo. ¹⁷ Arirakano nōmo Taetaseaki someraka, “Nōmo Korini aporo hinamoane ararehoko pusie.” Airakano epo someraka, “Ao. Ano pukusapo. Nōmo nī hemakapusuane soko i ararehoko seseripo. Ano seseraka pukusapo.”

¹⁸ Aiyaka epo seseraka somerakano, eyaki Keresoa paosa aporo mae hakása meta soko pusierakanapo. Arirakano aporo pusienamo Keresoa paosa aporoaki Yasuane hemakapusimo some kotesane some karakano, aporo suamo kairaka someraka, “Epo someane koteaka somerakae,” aiyaka Keresoa paosa aporo suamo somesapakae.

¹⁹ Somesa aporo hakasa yine e isuyaki pukua aporo metakiraki ararehoko mone sarimahokosakipoko Keresoa paosa aporomo soko e murikimasapo. Murikimarakano aporo makata forosaki ararehoko mone mokoa sarimarakanaapo. Sarimaraka aporo forosaki karakano aporo metakiramo aseraka Kotiane kekererakanapo. ²⁰ Arirakano aporo metakiramo someraka, “Mone kára sarimasane ipu hasaka parakuraka kasapo. Wakasema sapeane ipu hakimosapo.” Aiyaka ipu isuane hokorehokohoamo, moneane koteaka asekea risikiasimo, aporo metakira isuyaki hakása purakanapo. ²¹ Unihae Kotimo soko, aporo suamo soko, aseraka someraka, “Ipu mone siaraka asekea risikinapo.” Aihoasimo yumo isiaipo koteaka asekea risikinapo.

²² Asiamo isiaipo kakaro koteaka asekea risikiakosakipoko repo apea Keresoa paosa aporo mae hakása meta soko nōmo pusierakanapo. Eaki nōmo someraka, “Nōmo rakiako puane siahoasireare?” Aihoane maiya suamo epo someraka, “Ao rakiakosapo.” Aiyaka epo seserakano nōmo asesapo. Yumo soko epo hemakapuraka, “Korini aporomo Keresoa paosa aporo Yutía hauaka risiaki mone kakakosapo.” Aiyaka epo himu hakásaraka hemakapukua, repo sése apea e seséraka purakanapo, airakae.

²³ Arirakano nōmo repoko arareraka arakira aiyáka, Taetasemo soko, repoko arareraka anoyaki hakása rakirakanapo. Arirakano Keresoa paosa aporo mae tetá eyaki hakása pukusane, Keresoa paosa aporo hinamomo murikimasapo. Murikimarakano ipu rakiraka risike Keresomo yano motosa makárahokosapo. ²⁴ Aporo mone mokoako aperamo, repo

himu tumurumo hemakapurane asekeasimo mone sarimaraka kakanie. Karakano ipu someraka, "Poremo Korini aporoane koteaka risikinapo, aisane kakarohoareapo," aihokosapo. Aiyaka Keresoa paosa aporo hinamo sese ape metakira risiamo soko aihokosapo.

**Keresoa paosa aporo hinamo Yutía hauaka makata forokoa
risiane arareraka makata yaku kakanie, aisane oyapo.**

9 ¹Yutía hauaka Keresoa paosa aporo hinamo risiane, repo arareraka mone kakakosasamo, nōmo reaki nena poparakanapo. ²Repo kakaro seseraka kakasireapo, aiyaka nōmo hemakapurakaripo. Asiamo ano Masetónia hauaka á apuramo, Masetónia aporoaki nōmo someraka, "Korini aporomo mone kakakosapo. Akaia^h hauaka Keresoa paosa aporo risiamo keremisi hakása fasamo ipu kakakosapo, aisapo." Aiyaka nōmo repo yano motosane kekereraka somehokosapo. Somehoane repo kakakosakipoko sesésane ipu kairaka, aporo yakai metakiramo soko someraka, "Isiapo mone kakakosapo," airakasupo.

³Airakano nōmo re kekereraka somesane kotafe horakanareapo. Airapaka, Keresoa paosa aporo mae Taetase iane, repo hauaka á nōmo pusierakanapo. Nōmo iaki someraka, "Korini aporomo moneane sarimasapo." Airakano repo mone sarimasane ipu aseako pusierakanapo.

⁴Keseke Masetónia aporo anoyaki, re risia á peraka aseane repo mone sarimahoanafonosekeno aseraka, ano kaíyahoasireapo. Arirakano fana nōmo hemakapuraka, "Ipu mone kakakosapo," aiyaka aporo metakiraki re yano motosa makáraraka somesasamo repo mone sarimahoanafonosekeno asekeea ano kaíyahoasireapo. Ano kaíyaraka re soko kaíyahokosapo. ⁵Anapaka nōmo Keresoa paosa aporo maeaki someraka, "Re fana pusie. Ano kesekeea peakosapo," airakanapo. Asiamo repo mone kakakosaposane sarimahoasimo iane fana nōmo pusierakanapo. Repo namina hemakapukua seseraka yaku kayane soko siahoasireapo. Ano peraka nōmo reaki kakanie, airakano repo kayane siahoasifareapo.

⁶Arirakano mone yaku karámo kepoane oyapo. Aporomo makata mano hukusi poterakano, wateane soko hukusi tumorapo. Arirakano aporomo makata mano yakai poterakano wateane soko yakai tumorapo. ⁷Aina ayíáka repo mone kakakosane repo namina fana hakása hakásaraka hemakapunie. Repo namina hemakapusua nine kekemaraka kakanie. Aporomo ipi hemakapuraka, "Nōmo mone kára kakakosapo." Aiyaka hemakapukua mone kára kayane soko siahoasireapo. Arirakano aporo metamo hemakapuraka, "Nōmo mone wakasema kakakosapo." Aiyaka hemakapukua mone wakasema kayane soko siahoasireapo. Aporo

^h 9:2 Korini taoneane Akaia hauaka a kisiapo.

metamo ipi moneane aporo metamo kakanierakano, karáka himumo mahisiraka kayane siahoasifareapo. Aporomo ipi seseraka karakano Kotimo eaki seseraka hemakapurapo.

⁸ Kotimo reaki makata kóta kakakosane Kotimo ipi siaraka rekenapo. Ipi hemakapukua ararenane enonosa kakenafapo. Asiamo ararenane epo reaki karakano, repo kakaro siaraka mokoa risikinapo. Kotimo ararenane siaraka mokoa risikino, re namina himuane soko, kauane soko makotehoasimo, Kotimo siaraka arareraka rekenapo. Arirakano makata rakira kotesa rakisimo Kotimo siaraka arareraka rekenapo. ⁹ Arirakano makata kára kará aporoane Kotimo sawia popasane oyapo.

“Aporomo makata mano potena ayíáka, aporo kotesamo aporo makata forosaki makata kára karápo. Asiamo aporo kotesamo makata rakira kotesane fahokosafapo.” Aýaka popahoareapo. *(Buk Song 112:9)*

¹⁰ Asiamo makata mano potehoasimo karáne soko Kotimo karápo. Makata nakosa nasimo karáne soko Kotimo karápo. Makata su akaramo kepoane Koti ipi hákasapo. Aina ayíáka repo aporo metakiraki makata kakasimo Kotimo reaki kakakosapo. Makata mano tanehekea wate apera ayíáka, repo koteaka rakirane Kotimo makárahokosapo.

¹¹ Repo makata kára kakasimo Kotimo reaki makata kára kakakosapo. Karakano repo mone karáne isiapo mokoa aporo makata forosaki kakakosapo. Karakano repo i araresakipoko ipu Kotiaki kára susehokosapo. ¹² Asiamo repo makata akara aeyaka Kotimo aporo hinamo makata forosaki repo ararehokosapo. Repo makata karakano aporo yakaimo Kotiaki susehokosapo. Susehoane Kotimo yano motosane makárahokosapo.

¹³ Repo makata karakano Keresoa paosa aporo mae metakiramo soko aseakosapo. Aseane repo iaki soko, aporo metakiraki soko, makata kára yaku karakano asekea ipu someraka, “Mone kasá aporomo Unihae Kotiane seseraka hemaka apure. Arirakano Yasu Keresoane hemakapusimo some kasane ipu kakimaka arakire.” Aýaka repo moneane iaki kasasamo ipu Kotiane makáraraka susehokosapo. ¹⁴ Susehoane Kotimo re kára hemakapukua araresasamo, ipu reaki kára seseraka hemakapukua, Kotimo re efera hunia soko ararehoasimo kurikurihokosapo.

¹⁵ Arirakano Kotimo isuaki makata yaku kasá akipoko isiapo Kotiaki suserakanapo. Kotimo ipi hokosa Yasu Kereso isu ararehoko pusiesa, akipoko soko isiapo kára suserakanapo.

**Aporo metakiramo Poreaki topaka maraka somerakanano
Poremo someraka, “Kotimo ano murikimarakano nōmo
Kotipoko ereketae rakirakanapo,” aisane oyapo.**

10 ¹ Repo hemakapusimo ano Poremo reaki somerakanapo. Yasu Keresomo aporoaki hemakapukua tau auaraka somesa ayíáka,

nōmo soko re hemakapukua, repo kaiyisimo tau auaraka somerakanapo. Asiamo aporo metakiramo anoane topaka maraka someraka, "Isu hikumisia Poremo someana maiya amo epo tau somerapo. Arirakano e yamenoa reke isuaki me paroaka poparaka makerapo," aiyaka somerakanapakae. ²Arirakano aporo metakiramo someraka, "Poremo hauaka wo makata rakirane kára hemakapukua rakirakanapo," airakanapakae. Aiyaka somera aporoaki hikumisia nōmo me paroaka somehokosapo. Ano apera maiya amo nōmo reaki paroaka somerapaka, repo watikiaka somesane metakarinie.

³Isu hauaka wo risike, Kotiaki yununa aporo akiyaki isia po werakanapo. Asiāne isia po awerane hauaka aporomo awera ayiáka werakanafapo. Satanemo menaki isia po werakanapo. ⁴Arirakano hauaka wo aporomo weraka, poke ira rokopa menane hokonomo rakikia mokoa aporoyaki werapo. Asiane hauaka omo menane isia po mokoa werakanafapo. Arirakano Kotimo someane mawakasemana aporoane Kotiaki yununa aporo ayapo. Isia po Kotiaki yununa aporo akiyaki werakanapo. Weraka isia po Kotimo wakapuamo werakanapo. Asiamo isia po Kotimo wakapuane mokoa aweramo Kotiaki yununa aporoane hurutapiakosapo. ⁵Aporomo Kotiane kakaro hemakapukuhoamo aporo metakiramo namina yia makáraraka kotafe tafaraka somerapo. Asiamo ipu kotafe someane isia po marutaenapo. Kotiaki yununa aporoane ikia hasaka purapo. Asiamo iane pasimokoakosakipoko Kotimo wakapuamo isia po werakanapo. Asiamo isia po Kotimo kakaro someane some karakanapo. Some karakano ipu kaikia risikiako pariraka Yasu Keresomo hemakapusuane kekemahokosapo. ⁶Asiamo isia po some kasane repo metakiramo kaikia kekemarakano yia, metakiramo kaikia koarenterakanpo aporoane isia po maroporaka fanasihokosapo.

⁷Arirakano aporo metakiramo someraka, "Poreane tarira aporohoasimo Kotimo murikimasafapo." Airakano repo kairaka some ane koteaka takekeha hemakapurakanafapo. Repo kepo hemakapunafonoraka makata kima susu aserakanapo. Arirakano aporo metamo someraka, "Yasu Keresomo makata rakisimo murikimasane anopo. Refapo." Airakanone e soko Keresoa paoraka makata arakira ayiáka, isu soko Keresoa paoraka makata rakirapo. Aiyaka hemakapunie. Meraruhokopo. ⁸Repo Kotiaki himu hakásaraka hemakapurane makárahoasimo, Kotimo ano murikimasapo. Ano murikimasasamo, ano níane kekereraka sikiraka somerakanapo. Aiyaka somerakane, ano níyia karekerakanafapo. Arirakano aporomo ape kikia mako arakira ayiáka, re ararehoasimo Unihae Kotimo ano murikimasapo. Aporomo ape marakaritaena ayiáka, reane marutaehoasimo ano murikimasafapo. ⁹Asiamo nōmo reaki sawi popanamo re namohoasimo popanafapo.

¹⁰Asiamo aporo metakiramo someraka, "Poremo sawi popanamo paroaka someaka popanapo. Asiane e peraka epo aporo hikumisi

aseramo epo paroaka somerafapo.” Aíyaka kotafe somesapakae.

¹¹ Arirakano re yamenoa risiaki nōmo sawi popasane soko, ano pekea reyaki hakásá risike, reaki some karane soko, hakásá yinesapo. Nōmo sawia haku poparaka arirakano nōmo akaimo haku some ainafapo. Asiasamo ano hokomara aporoaki somehoanie.

¹² Aporo metakiramo ipu namina yano motosa makama fanaraka somerakano, isiaipo ayíáka somerafapo. Aporo akiyaki isina hakásá ninesafapo. Aporoamo hauaka wo makata hemakapusuane kekemaraká úyaka somerapo. Namina yia aporo hakásá metamo someraka, “Ano fanapo.” Airakano yaiya aporo hakásá metamo soko someraka, “Ano fanapo.” Airakano yaiya aporo hakásá metamo soko someraka, “Ano fanapo.” Aíyaka namina tafatafaraka kakanakeraka someraka risirapo. Aporoamo hasaka hemakapukua risike tafatafaraka kakanakeraka somerapo. Aíyaka someramo siaraka risikiakosa kepoane hemakapunafonoraka risike aíyaka mokome somerapo.

¹³ Arirakano Kotimo isuaki makata rakiniesane isiaipo rakisiapo. Asiamo Kotimo isuaki someraka, “Hauaka á pusie, ape á pusie,” aisa á isu pusuapo. Asiamo Kotimo isuaki makata rakisimo murikimasane isiaipo kekemaraká rakisiapo. Kotimo somesane isiaipo marokesafapo. Asiamo isiaipo makata rakianafonosane isiaipo isina makáraraka reaki somehokosafapo. Asiāne repo taonea makata rakisimo Kotimo isu pusierakano isu pesapo. Pekea isiaipo namo kakaro koteaka rakisiapo. ¹⁴ Arirakano Kotimo ano tarira apororaka rakisimo murikimaka, repo taonea pusierakano ano pesapo. Asiamo repo Yasu Keresoane hemakapusimo ano fana pekea reaki some kotesa some karaka reapo. Asiamo re nōmo sia maropohokosapo. Arirakano aporomo someraka, “Nōmo Korini aporoane sia maropohokosafapo,” aíyaka somerakano ipu someane kotafe somerakanapo. ¹⁵ Arirakano isiaipo makata rakisiane ipu kotafe someraka, “Isiaipo rakisiapo,” aíyaka somerakano reane mahimetesapo. Asiamo aporo metamo rakisiane isiaipo aseraka kotafe someraka, “Isiaipo rakisiapo,” aíyaka isiaipo somerafapo. Kotimo rakiniesane isiaipo rakisiapo, aíyaka kekereraka somerakanapo. Repo Kotiaki himu hakásaraka hemakapurane kárahoasimo isiaipo hemakapurakaripo. Arirakano repo aorakano isiaipo reyaki kára rakiako hemakapurakaripo.

¹⁶ Kára rakikia maka, hauaka meta á pukua aporo metakiraki some kakako pukusapo. Asiamo isu fana pukua some karakano, aporo metamo someane some kakanafonosa kawe kaiyakosapo. Asiamo aporo metamo some kakanafonosasamo, isiaipo fanaraka some kasasamo metamo isuaki kakanakeraka somehokosafapo.

¹⁷ Arirakano Kotimo sawia popasane oyapo. “Repo namina yia makata rakisiane kekerohoko. Kotimo makata rakisiane kekerohoanie,” aíyaka popahoareapo. *(Jeremaia 9:24)*

¹⁸ Arirakano aporomo ipi yia makáraraka kekererakano, ane siahoasifareapo. Arirakano Kotimo aporoane makáraraka kekererakano, ane siahoasireapo.

**Poremo makata rakira akipe kotafe tarira aporomo
makata rakira tati hakása ninesafapo, aisane oyapo.**

11 ¹Repo anoaki someraka, “Ne himu rekenafareapo,”
aisapakae. Asiamo ano himu rekeanafonosa yamo, nōmo
reaki somerakanapo. Somerakano repo kaisie. ²Kotimo reane kara
hemakapusuasamo aporo metamo someane repo kekemarakano, Koti
himu kára nakosapo. Aina ayíáka ano soko himu nenakanapo. Keresomo
re hinamo ayíáka arumakasimo, reane epo faisasamo nōmo re asekea
rekenapo. Hinamomo aporo hakása apura ayíáka, re Kereso hákasa
pusimo, reane nōmo asekea rekenapo. Asekea reke re ikia hinamonapaka
nōmo asekea rekenapo.

³ Arirakano kuyaremo mahoperaka kotafe somesane Ifimo kakimasapo.
Asia ayíáka aporo metamo some meta kotafe somerakano repo Yasu
Keresoaki himu hakásaraka hemakapurane mahimeteraka, aporo
metamo kotafe somerakano, someane repo kakimakasireapo. Anapaka
nōmo reane hemakapukua himu farakanapo. ⁴Asiamo ano himu fána
amo kepoane oyapo. Re himu tetaraka risike, sere metamo aporo metamo
somerakano á kekemarakana, sere metamo aporo metamo somerakano
á kekemarakana anapo. Fanā isiapo reaki Yasuane some karakano isiapo
someane repo kakimasapo. Arirakano aporo meta peraka Yasuane some
haku some karakano, aporoamo kotafe someane repo kakimakasireapo.
Arirakano fanā Ho Kotesane repo masapo. Kotafe someane repo
kekemarakano ho meta watikisane repo makasireapo. Arirakano fanā
Keresoane repo hemakapusimo some kotesane isiapo some karakano,
repo kakimasapo. Asiāne kepo meta hemakapusimo, aporo metamo
some meta some karakano, repo yaiya kakimakasireapo. Repo takekea
hemakapunafonoraka some metane seseraka kakimarakanapaka.

⁵ Arirakano some meta some kará aporoaki repo someraka, “Reane
tarira aporeapo.” Aíyaka iane makama fanaraka, ano makama
kesekeraka somehoane siahoasifareapo. Ano mayireare? I fanaraka
ano kesekefapo. ⁶ Asiamo nōmo akaimo fofóaka somerafapo.
Nōmo masekeame somerapo. Asiāne some kepo suane nōmo
hemakapurakanapo. Hemakapuraka repo suamo kaiyisimo makata kepo
suane nōmo reaki some kasapo.

⁷ Arirakano Kotimo someane nōmo reaki some kasa akipoko, nōmo
makata ropo masafapo. Makata ropo makosane metakarikia, re
makotehoko aporo raipamo arakira ayíáka, ano ni makama kesekeraka
yaku rakisiapo. Nōmo yaku rakisia amo reane makotesapo. Asiamo repo

anoaki someraka, "Ne watikirareapo," aihokopo. ⁸ Re yaku ararehoko, Keresoa paosa aporo hauaka metakira risiamo ano mone karakano, nōmo mosapo. Repo ano kakafunusa nine, repo ano kakanafonorakano, asekeea aporo metakiramo ano karakasupo. Repoko nōmo rakiraka reke ipu menane nōmo yaku mosapo. ⁹ Asiamo ano reyaki rea maiya amo nōmo mone fasekeno reaki someraka, "Ano makata nakosa kakanie," aisafapo. Repo hisihokohoamo Masetónia hauaka aeyaka aporo metakira pekea, ano mone karakano, nōmo mokoa makata nakosa roposapo. Repo anoaki mahisinapaka reaki nōmo makata umisa maresafapo. Repo mahisinapaka, "Repo ano makasie," aisafapo. Fana nōmo reaki makasie aihoanafonosasamo, keseke soko, nōmo reaki makasie aihokosafapo.

¹⁰ Yasu Keresomo ipi kakaro somera ayíáka, nōmo soko kakaro somerakanapo. Nōmo reaki someraka, "Makasie," aihoanafonosakipoko ano nī seseraka somerakanapo. Arirakano Akaia hauaka á aporo risiamo anoaki someraka, "Nōmo kotaferipo," aihokosafapo. ¹¹ Asiamo nōmo maíyaka somerakarire? Nōmo reane hemakapunafonoraka somerakarire? Wae, nōmo re kakaro seseraka hemakapuraka somerakaripo. Asiamo nōmo some kepoane Kotimo asekeea hemakapurakanapo. ¹² Yumo repo mone nōmo mokoanafonona ayíáka, keseke soko nōmo mokoakosafapo. Arirakano kotafe tarira aporomo someraka, "Poremo rakira ayíáka, isiapo soko hakásá yineraka rakirakanapo." Áiyaka namina yia kekereraka somerapaka, repo moneane nōmo mokoakosafapo. Nōmo makata ropo mokoanafononasamo, ipu makata ropo mora akiyaki isina hakásá yinesafapo.

¹³ Re arisia aporo metakira peraka someraka, "Isu tarira aporopo," aisa aporoane namo kakaro tarira aporofapo. Iane kotafe tarira aporopo. Repo iane aseraka, namo kakaro Keresomo tarira apororeapo, aihoasimo ipu re mahoperaka kotafe rakirakanapo. ¹⁴ Arirakano aporoamo kotafe rakirakano ano fofarakanaafapo. Satane ipi kau kima hákasane kotafe hepene aporo faesa pariraka rekeno aporomo aseraka someraka, "E hepene aporopo," airapo. ¹⁵ Satane kotafe hepene aporo pariraka area ayíáka, eaki patera asesa aporoane soko, kotafe aporo ereketaesa pariraka risikino, aporo hinamomo kotafe aporo ereketaesa parisane aseraka someraka, "Aporoane ereketaehoareapo," airapo. Kotafe aporo ereketaesa parisasamo keseke ipu namina makata rakisia yinaka makata ropo mokoakosapo.

Aporomo Pore mokoatikisane oyapo.

¹⁶ Fana nōmo reaki makata somesane efera hunia somerakanapo. Repo anoaki someraka, "Ne himu rekenafareapo," aisapakae. Aisa aporo repo, nōmo someane kaisie. Ano himu rekenapo. Arirakano kotafe tarira aporomo namina yia kekereraka somesapo. Asiamo yumo nōmo soko, ano

nīane kekereraka somerakanapo. Asiamo nōmo someane repo kairaka, Pore himu rekenafareapo, airakano, nōmo kára hemakapukusafapo. ¹⁷Unihae Kotimo anoaki someraka, “Nōmo nī kekereraka somehoanie,” aisiafapo. Aihoanafonosa nine ano nī yia kekereraka aporo himu rekeanafonosamo someana ayiáka nōmo somerakanapo.

¹⁸Aporo metakiramo hauaka wo makata hemakapusua kekemaraka ipu namina makata rakira makárana ayiáka, nōmo soko ano nīane makáraraka kekereraka somerakanapo. ¹⁹Repo makata kára enomaka hemakapurakayia, aporo himu hemakapura fasa kotafe tarira aporoane repo seseaka karikia risikinapo. ²⁰Karikia hakāsa risikino, ipu reane aporo raipa mapariraka isupoko rakinie, airapo. Aíyaka repo makata nakosa soko, moneane soko, ipu morakanapakae. Ipu mahoperaka risike, matewaraka risike, re mawakasemaraka hikumisia fawaka rurakano yia repo i seseraka pasimokoa karikia hakāsa risikinapakae. ²¹Ipu aina ayiáka isiapo ásiafapo. Isiapo re runafonoraka metakarirakasuane, isu re asekea namoraka airakasure? Wae. Isu namosafapo. Isiapo re runafonorakano aporomo aseraka someraka, “Pore ipi rorasapo,” airakanapakae. Ano nī kekereraka someraka aporo himu rekeanafonosamo somera ayiáka nōmo somerakanapo. Asiāne ipu namina kekereraka somesa ayiáka, nōmo soko, nī kekereraka somerakanapo.

²²Kotafe tarira aporomo ipu Hipuru meaka somerare? Ao, ipu Hipuru meaka somerasekeno, ane nōmo soko Hipuru meaka somerapo. Aporoane Isiraya aporore? Ao, i Isiraya aporsekeno, ane ano soko Isiraya aporopo. Aporoane Eparahamemo aporo irare? Ao, i Eparahamemo aporo irasekeno, ane ano soko Eparahamemo aporo irapo.

²³Aporoane Keresomo aporo raipare? Keresomo aporo raipa fanaraka reane anopo. Ano nī kekereraka somenane aporo himu hemakapura fasamo somera ayiáka nōmo somerakanapo. Ipu rakisiane nōmo marokeraka nōmo namo kakaro kára rakisiapo. Arirakano yape yakai ano tipura makekeea, arirakano yape yakai ano rukua mokoatikiraka kusuahopo.

²⁴Arirakano Yu aporomo ano rusuane teti naene (39) ayiáka menoraka, yape kakoreasumo ayiáka saro kau terakaemo ano rusuapo. ²⁵Arirakano yape isiammo Rome kamani aporomo ira faimo ano rusuapo. Arirakano yape hakásamo ekemo ano karesapo. Arirakano yape isiammo kasu sipia ano ripasane arosapo. Yape hakásamo kasu sipi arorakano ere hakásá, sere hakásá, ayiáka ano ira arosane maka, he tawara kima tapukureapo.

²⁶Arirakano ano kimisi apura maiya amo makata káramo ano mokoatikinapo. He kára kukurupiraka perakano asekea, arirakano maiya metakiramo aporomo nōmo makata kemoane hakimokoakosakipoko ipu ano rukusakipoko risikino asesapo. Arirakano nōmo nī aporo ira Yu aporo yiama soko, ano rukusakipoko risikino asesapo. Arirakano

Yu aporo hoanafonosamo soko, ano mokoatikihokosakipoko risikino asesapo. Arirakano kotafe Keresoa paosa aporo maemo soko, ano mokoatikihokosakipoko risikino asesapo. Arirakano maiya metakiramo ano mokoatikirakano ape sumu metakira á soko, yaoa soko, he tawara soko, ano kusuahopo.²⁷ Asiamo nōmo arakiramo wafororaka rakirapo. Ereamo wakanafonorakano soko, meamorakano soko, he narirakano soko, nōmo yaiya rakiraka reapo. Maiya metamo makata nakosane soko faraka kusuahopo. Arirakano ano pasu siahoanafonosasamo kára inuraka reapo.

²⁸ Ayíáka reke maiya suamo Keresoa paosa aporo hinamoane nōmo asekea reapo. Asekea reke nōmo hemakapuraka, "I siaraka risikinarakapo. I hasakaraka risikinarakapo." Aýáka kára hemakapukua rekenapo. ²⁹ Arirakano aporo metamo Keresoaki himu hakásaraka hemakapusuane paroaka rekeanafonorakano aseraka, aporoane nōmo kára hemakapurakanapo. Arirakano Keresoa paosa aporo metamo watikiaka rakisimo aporo metamo kirimarakano aseraka, nōmo kára mahisiraka hemakapurakanapo. Nōmo kára rakikia, kára hemakapukua, ayíáka ano rekenapo.

³⁰ Ano nīane makáraraka somehoko hisirakanapo. Nōmo nī yano motosane makárahoafunufapo. Asiāne aporo metakiramo namina yano motosane makárarakanano, nōmo soko nī yano motosane makárarakanapo. Asiamo anoaki makata fasere perakano nōmo nī wakapumo siahoasifasekeno asekea somerakanapo. ³¹ Kotiane ipi Unihae Yasumo Ata ane, maiya suamo isiaipo kekererakanapo. Kotimo kairakano nōmo kotafe somerakanafapo. ³² Arirakano Tamásakase taonea ano rea maiya amo, tipura makeasimo Aretase unihaeaka rea maiya amo, taoneane kamani aporo asekea reamo aporo terakaiyamosaki someraka, "Ape ruru ikia koroa Pore purakarihoamo Pore waseremako asekea risikianie." ³³ Airakano ipu asekea risiapo. Asekea risikino yia ano fefeneaku asiakipoko makekea ruru winito anakta metafirirakano metafirirakanoraka hauaka atura motorakano ano takaripusuapo.

**Kotafe tarira aporomo someane Poremo hurutapiasimo Kotimo
Poreaki makata tarirakano Poremo somesane oyapo.**

12 ¹ Kotimo ano murikimasane repo hemakapusimo ano nīane kekereraka somehokosapo. Kekereraka someanamo ano nī makárahokosafapo. Nōmo kekereraka someanane nenakamaka somerakanapo. Asiamo nōmo kituamo Unihae Kotimo anoaki makata tarirakano, nōmo asesane reaki somerakanapo.

² Keremisi senakis (14) faraka, Keresoa paosa anoane hepene yapura Koti ipi rea hauaka áⁱ Kotimo ano pasimaka hisiapo. Ano pasimarakano

ⁱ 12:2 Hepene yapurane isiane Koti ipi rea ayapo, aisapakae.

hisiane nōmo hemakapurakanapo. Ano ho hákasa hinaka soko metao, kauyaki hoyaki hakāsa hinaka soko metao, nōmo hemakapurakanafapo. Kotimo ipi hákasa hemakapurakanapo.^j 3 Arirakano anoane hepene yapura hisia amo, hepeneane yano motosa Párataese^k á pasimarakano hisiane, ho hákasa hinaka soko metao, kauyaki hoyaki hakāsa hinaka soko metao, nōmo hemakapurakanafapo. Kotimo ipi hákasa hemakapurakanapo.

⁴ Ano hepene yapura pasimarakano hikia reke, hepene yapura makata kaikia ano peraka, hauaka wo nōmo murikimaka somehoasifapo. Hepene yapura namo kakaro haku kakenapo. Hauaka ukiyaki hepene yapura akiyaki murikimaka somehoasi kakenafapo.⁵ 5 Anoane hepene yapura pasimarakano hisiane nōmo somehokosapoko asiane nōmo ano nīane makáraraka somehokosafapo. Arirakano ano hauaka wo reke anoaki makata fasereperakano nōmo nī wakapu amo siahoasifasekeno makata ane repo kaiyisimo somerakanapo.⁶ 6 Nōmo nī yia kekereraka somesa satiki, aporo himu rekeanafonosamo somera ayiáka somehoafunufapo. Asiane nōmo somerakano ane kakaro somehokosapo. Nōmo kakaro someraka nōmo ano nīane kekereraka somehokosapoko asiane, aporomo anoaki someraka, “Né aporo káraro.” Airapaka nōmo ano nīane kekereraka somehokosafapo. Nōmo makata rakisiiane soko aporomo asekea, arirakano nōmo some kasane soko aporomo kaikia, asiamo nōmo ainane soko, nōmo rakirane soko ipu asekea anoane hemakapukusapo. Asiamo ano nīane makáraraka somehokosafapo.

⁷ 7 Arirakano Kotimo anoaki makata kára tarirakano nōmo asesapo. Nōmo asesasamo ano nī yia makáraraka rekeafunureapo. Asiāne ano nī makáraraka rekeakoahoamo ano kaua keta ásia^k Kotimo kasá amo karesapo. Keta ásiane Satanemo aporo raipamo ano akarerera ayiáka ketamo ano karerakano tesapo.

⁸ 8 Ano teraka reke yape isiamo nōmo Kotiaki wáraka, “Keta asiamo ano akarerane metakarinie.” ⁹ 9 Airakano Kotimo anoaki someraka, “Nōmo neane hemakapukua yaku ararehokosa ane siapo. Asiamo né roraraka rekeno, nōmo wakapu amo né mawakapuhokosapo.” Airakano ano roraraka reke yia, hisiraka rekenafapo. Ano rorasa nine seseraka rekenapo. Asiamo Keresomo wakapu anoyaki rekerakano kaikia, anō seseraka rekenapo.

¹⁰ 10 Ano roraraka reke yia nōmo Keresopoko rakiraka reke, aporo metakiramo anoaki mainamarerakano soko, makata amo anō ayakarie, aiyaka mekeraka yaiya rakiraka rekenapo. Arirakano ano mokoatikirakano soko, Keresopoko nōmo yaiya rakiraka reke anō

^j 12:3 Hepene hauaka ane yano motosa Párataese, aiyaka somerane hauaka ane kotesapo.

^k 12:7 Keta somesane isiapo kepoane hemakapurakanafapo. Asiāne isiapo hemakapuraka keta ane makata takamara ayareapo.

kusuahopo. Asiāne nōmo someraka, “Siapo,” airakanapo. Asiamo ano roraraka rekeno, Keresomo ano ararenapo. Ararerakano ano wakapuaka rekenapo.

Poremo Korini aporo hinamoane kára hemakapusuane oyapo.

¹¹ Fana repo ano kekerahoafunusa nine repo ano kekeresafapo. Repo ano kekerahoanafonorakano nōmo aporo himu rekeanafonosamo somehora ayiáka nōmo somerakanapo. Repo ano aporo wakasemaporakano yia, kotafe tarira aporoane repo makama fanasa amo ano marokesafapo. ¹² Tarira aporomo arakira ayiáka, nōmo makata rakirane Kotimo wakapuyaki rakirakano repo aserakasupo. Tarira aporomo arakira ayiáka nōmo rakisiane oyapo. Kotimo ipi hemakapukua wakapu rakirane nōmo rakirakano aporomo aseraka someraka, “Kotimo rakirane ayareapo,” aihoasimo nōmo rakisiapo. Tarira aporomo rakirane repo asekeasimo nōmo maiya káramo rakisiapo. Asiamo nōmo tarira apororaka rakisimo Kotimo ano murikimasane repo aserakasupo.

¹³ Arirakano repo anoaki someraka, “Keresoa paosa aporo hinamo sése ape metakira á risiane nōmo makama fanaraka, isu makama kesekesapo.” Aisaporakane nōmo re mayiáka makama kesekesare? Nōmo iane araresa ayiáka, re soko ayiáka araresapo. Asiane repo moneane ano arareraka ano kasafapo. Repo moneane nōmo mokoanafonosane nōmo hasaka rakisiare? Repo saperaka hasaka hemakapusuane metakarinie.

¹⁴ Yumo yape isiamo repo apea ano peakosakipoko makata kemo sarikesapo. Ano peraka repo moneane nōmo makasie, aihokosafapo. Repo moneane nōmo makosapoko hemakapurakarifapo. Repo anoaki himu auaraka hemakapukua risikiasimo nōmo hemakapurakaripo. Arirakano hokusamo ipi atape ipi ama tetápoko makata nakosa soko, pasu soko, karáfapo. Ipi atamo ipi hokusaki karápo. Aina ayiáka re nōmo hokosa asiasamo nōmo reane ararehoko hemakapurakanapo. ¹⁵ Repo atane anosasamo nōmo makata su reaki kakakosapo. Re nōmo arareraka makotehoko nōmo wakapumo repoko rakiakosapo. Nōmo re kára seseraka hemakapusuasamo, repo ano wakasema hemakapukusare?

¹⁶ Repo moneane nōmo mosafapo. Aiyaka nōmo somesane repo kaikia kakarorakae, aisapo. Aisa nine repo isuaki someraka, “Poremo kotafe hokoa, isiapo aserapaka, mahoperaka tau hakimasapo.” ¹⁷ Airakano nōmo reaki someraka, “Masinaka nōmo hakimosare? Nōmo pusiesa aporoane pekea ipu kotafe hokoa makata hakimosare? Anoaki makata yakapa kasare? ¹⁸ Nōmo Taetase soko, Keresoa paosa aporo mae meta soko, repo sése apea pusiesapo. Pusierakano Taetase repo sése apea peraka, tetapō makata meta hakimasafapo. Taetasemo hemaka apura ayiáka, nōmo soko, ayiáka hemakapurapo. Epo arakira ayiáka, nōmo soko, ayiáka rakirapo,” airakaripo,

¹⁹Arirakano repo hemakapuraka, “Isiapo Pore patera asekeasimo Poremo ipi yiamo makáraraka tafáraka somerakae.” Aíyaka repo hemakapurakanare? Repo aíyaka hemakapukupo. Hameo, Kotimo kairakano isiapo Yasu Keresoaki kataka marekea risike reane ararehokosakipoko somesapo.

²⁰Ano peraka re koteaka risikino aseakoripo. Asiane re koteaka risike soko metao, watikiaka risike soko metao, mayíáka risikino asekeanarakapo. Arirakano keseke ano peraka re aseramo, nōmo reaki mahisiraka soko metao, reaki seseraka soko metao, ano himeteripo. Arirakano repo anoaki mahisiraka soko metao, seseraka soko metao, ano himeteripo. Ano aperamo nōmo aseane repo tafatafanane soko, kakanakenane soko, tapare sapenane soko, repo namina mena himu tumurumo hemakapurane soko, aporo meta mainamarerane soko, aporo metaki some koakamarekea somerane soko, re namina makáraraka koarellaenane soko, hasakaraka mokome rakirane soko, repo yaiya rakiraka risikino nōmo asekeanarakapo. Asiamo repo ayiáka rakiraka risikinone ane metakarinie.

²¹Ano aperamo aseane aporo metakiramo hinamo hakimorane soko, maiya suamo hinamo hakimokoako hemakapurane soko, repo yaiya rakiraka risike watikisane hufitaeraka rukupatehoanafonosekeno aseraka, repoko nōmo hiripuhokosapo. Repo asekeasimo repo watikisane Kotimo anoaki tarirakano, ano kaýahokosapo. Ano apera maiya amo ayikanarakapo.

“Repo makata watikiaka rakisiane maropohoanafonosekeno, ano aperamo re maropohokosapo,” aíyaka Poremo somesane oyapo.

13 ¹Fana yape tetá repo sése apea ano pesapo. Yumo soko, yape isiamo ano peakosakipoko, nōmo makata kemo sarikesapo. Arirakano Kotimo sawia popasane oyapo. “Hukuarura maiya amo aporoaki fanasihokosane motoakosakipoko, aporo tetámo asesa soko metao, aporo isiamo asesa soko metao, makata asesane hakásá nineraka somehoanie. Asesa aporomo hakásá nineraka somehoanafonorakano fanasihokosane metakarinie.” Aíyaka popahoareapo. *(Lo 17:6)*

²Fana ano yape tetá pesa maiya amo aporo watikiaka risiaki nōmo someraka, “Re watikiaka risikiakopo,” aíyaka nōmo somesapo. Yape tetá pesa maiya amo ayiakakopo, aisa ayiáka, yumo soko ano yamenoa reke, nōmo efera hunia somerakanapo. Nōmo someraka, “Ano apera maiya amo pekea aseane, aporo fana watikiaka risiane yaiya watikiaka risikino aseraka soko metao, aporo metakiramo kawe makata watikiaka rakiraka risikino aseraka soko metao, repo ayiáka rakiraka risikino re nōmo kamenakahokosafapo. Kamenakahoaanafonoraka fanasihokosane soko metakariakosafapo. Kakaro fanasihokosapo.

³Repo someraka, “Keresomo né aeyaka some karáka tiki some karakao, ane isiaipo mayíáka hemakapukusare?” Aíyaka repo somerakane mairakare? Repo makata watikiaka rakirakan maropohokosakipoko Keresomo asekepayanafapo. Asiamo repo makata watikisane mafahokosakipoko, repo himua Keresomo wakapuaka rakirapo.

⁴Arirakano fana Keresomo kauane wakapuhoanafonoraka, ira matopesa paremarerakano e kusuapo. E kusuane Kotimo wakapuane karakano, wakapu ane maka yaiya rekenapo. E wakapuhoanafonoraka rea ayíáka, isu soko wakapuhoanafonoraka risikinapo. Asiāne Kotimo wakapuane Yasuaki karakano, wakapu ane epo maka area ayíáka, isiaipo soko Kotimo wakapuane maka, wakapuaka risike re maropohokosapo.

⁵Arirakano re namina hakásara himua fana koanie. Kokoa someraka, “Ano Kotiaki kakaro himu hakásaraka rekenare? O, Kotiaki himu hakásaraka rekenafare?” Aíyaka repo namina himua kokoa hemakapunie. Repo namina hakásara himua someraka, “Yasu Kereso ano himua rekenapo,” aíyaka somehoasimo nōmo hemakapurakaripo. Repo Yasuaki himu hakásaraka hemakapunafonosekenone, e re himua rekenafapo. Rekeanafonorakanone, re siaraka risikinafapo. ⁶Asiamo repo anoane someraka, “Poremo Yasuaki himu hakásaraka hemakapukua rekenapo. Asiamo e siaraka rekenapo.” Aíyaka repo somehoasimo nōmo hemakapurakaripo.

⁷Arirakano repo watikiaka rakiakohoamo isiaipo repoko farimaka kurikurirakanapo. Repo watikiaka rakianafonorakano aporo metakiramo asekea isuane makáraraka someraka, “Pore ipu koteaka rakisiapo,” aihoasimo repoko kurikurirakanafapo. Aporomo isuane makáraraka soko metao, makárahoanafonoraka soko metao, isiaipo repoko farimaka Kotiaki kurikurirakanapo. Re ereketae koteaka risikiasimo isiaipo hemakapurakaripo. Asiamo isiaipo repoko farimaka kurikurianane kepo akipoko kurikurirakanapo. ⁸Arirakano re ereketae koteaka risike Kotimo kakaro someane kekemarakanone, isiaipo reane maropohokosafapo. Kakaro someane isiaipo rakikia rosaka taehokosakipoko rakirakanapo. ⁹Arirakano aporo metakiramo ano hokomaka someraka, “Poreane wakapuaka rekenafapo.” Airakano yia ano wakapuaka rekenapo. Re namina Keresosane paroaka risikino, ano seseraka rekenapo. Asiamo nōmo re maropohokosane kepo makipoko maropohokosare? Nōmo re maropohoasifareapo. Asiamo re namo kakaro koteaka risiakiasimo nōmo re farimaka kurikurirakanapo.

¹⁰Arirakano Unihae Kotimo ipi makata rakirane rakisimo, ano murikimasapo. Murikimaka epo wakapuane anoaki kasapo. Asiamo Kotimo wakapuamo nōmo reane ararehoko hemakapurakaripo. Kotimo wakapuamo nōmo reane maroporaka fanashoko hemakapurakarifapo. Asiamo pipu yumo ano yameno aeyaka reke, nōmo reaki sawi

poparakanapo. Ano apera maiya amo, re nōmo kára fanasinapaka, fana reaki sawi poparaka makerakanapo. Asiāne repo makata watikisane maropohoanafonosekeno, nōmo wakapuyaki re maroporaka fanasihokosapo.

Poremo ayapasane oyapo.

¹¹Keresoa paosa aporo maeo, nōmo some yiyo. Reaki nōmo ayaparakanapo. Repo namina Keresosane koteaka risikiako makata watikisamo reane kirimanapaka koteaka wakapuaka asekea risikianie. Nōmo someane kakimaka risikianie. Re namina yia himu hakásaraka risikianie. Arirakano aporo metaki tau auaraka risikianie. Arirakano aporo meta himu tumurumo hemakapuramo kepoane soko, auaraka risiramo kepoane soko, Koti ipipo. Ipi reyaki rekeasimo nōmo hemakapurakaripo.

¹²Keresoa paosa mae papa repo namina yia hokono mokoanie.

¹³Keresoa paosa aporo hinamo suamo reaki hemakapurakaripo airapakae.

¹⁴Unihae Yasu Keresomo re su yaku ararenane soko, arirakano Kotimo re suaki seleraka hemakapurane soko, arirakano Ho Kotesane soko re su himua risikiasimo nōmo hemakapurakaripo.